



防疫生活遽遽過

自今年（2021年）个母親節過忒，國內本土新冠肺炎个疫情緊來緊嚴重，偲俚臺灣就進入第三級个防疫生活。除了有必要出門辦事情、買生活用品、買菜等等，偲想大部分个人都配合國家个政策，在屋下園等盡量毋出門。

得病个人數超過幾下百儕个時節，感覺實在得人驚，一時也看毋出哪量時正會結束？毋過，偲對疫情指揮中心，專業个團隊摻佢兜煞猛、負責任个態度當有信心，相信大家心肝安定、莫愁慮，照防疫个規則來做，切斷病毒邇來邇去个機會，定著會穩定下來。無好出門行寮，關在屋下个時節，偲想，歸下閒閒無落無著也毋係辦法，愛分自家个生活有重點，有一隻目標，日仔會過到較遽。所以，偲就摻細細該下，中意刺膨紗个興趣拈轉來。

小學高年級个時節，先生有教大家勾膨紗，雖然單淨學一滴基礎定，偲試著越搞越生趣。有一擺，看著阿姆有一領舊个膨紗衫，偲就緊拜託佢：「衫拆忒，線分偲刺膨紗好無？」阿姆應講：「莫恁打爽哪，該好好个衫愛拿來拆忒！你刺得出來無？做毋得恁敗家！」。國中時期，先生教偲兜刺袋仔，愛做該隻學期个作業，該量時，偲正有完整个作品出現。讀到高中，升學个壓力當重，逐日無閒直掣應付考試，漸漸就摻這項興趣放忒咧。

堵著現下恁樣个時勢也無法度，總係愛耐心等落去。好得這下網路恁發達又便利，偲想刺一領衫分妹仔、兩頂帽仔分孫仔、幾雙襪仔分孫女，有當多教學影片做得參考。在網路頂買齊愛使用个東西，防疫生活一日過一日，偲用膨紗線「上針、下針」連接起來，針針線線都有偲个愛心。無鬥緊、定定仔刺，心肝肚想：無定著這領衫刺好，疫情就受著控制咧。

果然毋會差，第三級防疫个日仔過忒兩個月，國內本土確診个人數就控制到三十儕以下，偲也完成自家想愛達成个目標。幹轉頭來看這兩個月个生活，偲細義保護自家，心情放開、無緊張，毋多知仔，一瞞目就過去咧。

作者：陳美燕

☆詞彙學習☆

【園】kongˋ：躲藏。

【邇】cheˋ：傳染、擴散、蔓延。

【無閒直掣】mo han chidˋ chadˋ：事情多到
沒有時間休息，忙得不可開交。

【無落無著】mo logˋ mo chogˋ：沒有著落、
尚未有結果。

【刺膨紗】ciag pongˋ saˋ：織毛線。

【拈轉來】ngiamˋ zhonˋ loi：撿拾回來。

【鬥緊】deuˋ ginˋ：趕緊、緊急。

【幹轉頭】vad zhonˋ teu：指人或車輛等回頭、
調頭的動作。

【瞞目】ngiab mug：眼睛眨一下。